

आकाशवाणी जयपुर-अजमेर
प्रादेशिक समाचार
दिनांक 25.08.2024 समय: 18.45 बजे

- प्रधानमंत्री नरेन्द्र मोदी जस्टिस फोर ऑल सारू तकनीक री जरूरत माथे जोर दियो।
- प्रधानमंत्री अंतरिक्ष हलका मांय व्ह्या सुधारां री सरावना करी-मन की बात कार्यक्रम मांय आप रा विचार साझा करता श्री मोदी लोगां ऊं पोषण अभियान ऊं जुड़ण री ई अरज करी।
- केन्द्रीय कर्मचारियां सारू एकीकृत पेंशन योजना-यूपीएस ने मंजूरी दिया जावण माथे कर्मचारी संगठनां जताई खुशी।
- प्रदेश मांय मॉनसूनी बिरखा रो दौर चाले-आवता दो-तीन दिन राज्य रा दिखणाद अर अगूणी हलकां मांय भारी बिरखा री आस।

000

प्रधानमंत्री नरेन्द्र मोदी कह्यो है के केन्द्र सरकार नुवा आपराधिक कानूनां मांय दण्ड री ठौड़ न्याय ने जगह दी है। आज जोधपुर मांय राजस्थान हाईकोर्ट रा हीरक जयंती समापन जळसा मांय बोलता प्रधानमंत्री कह्यो के केन्द्र सरकार सैंकड़ो औपनिवेशिक कानूनां ने खतम कर्या है। श्री मोदी जस्टिस फोर ऑल सारू टेक्नोलॉजी री जरूरत माथे जोर दियो। वणा कह्यो के आज देश मांय 18 हजार ऊं बत्ती अदालतां ने कम्प्यूटर ऊं जोड़्या जा चुक्या है। अर 26 करोड़ ऊं बत्ती मामलां री जाणकारी नेशनल ज्युडिशियल ग्रिड ऊं एक ही ठौड़ मुहैया करायी जावे। श्री मोदी कह्यो के राजस्थान हाईकोर्ट रा अस्तित्व ऊं देश री एकता रो इतिहास ई जुड्यो है अर राष्ट्रीय एकता आपा री न्यायिक व्यवस्था री आधारशिला है।

.....

ई मौके राज्यपाल हरिभाऊ बागडे, मुख्यमंत्री भजनलाल शर्मा, केन्द्रीय कानून मंत्री अर्जुनराम मेघवाल, उच्चतम न्यायालय रा न्यायाधीश संजीव खन्ना, राजस्थान उच्च न्यायालय रा मुख्य न्यायाधीश मनिन्द्र मोहन श्रीवास्तव समेत घणी तादाद मांय न्यायिक अहलकार अर वकील मौजूद रह्या। ई मौके प्रधानमंत्री त्वरित कार्यक्रम ने लॉन्च कर्या। राजस्थान हाईकोर्ट पैलो राज्य है जिण ओ कार्यक्रम सरू कर्यो है। प्रधानमंत्री राजस्थान उच्च न्यायालय रा संग्रहालय रो उद्घाटन कर्यो अर एक स्मारिका रो ई विमोचन कर्यो। इण ऊं पैला प्रधानमंत्री नरेन्द्र मोदी आज महाराष्ट्र रा जलगांव मांय एक जळसा मांय 11 लाख नुवी लखपति दीदियां ने प्रमाण पत्र दिया। कार्यक्रम रे दौरान प्रधानमंत्री सामुदायिक निवेश कोष सारू अढाई हजार करोड़ रूप्या ई जारी कर्या। इण ऊं स्वयं सहायता समूहां रा 48 लाख सदस्यां ने फायदो होवण री आस है। ध्यानजोग है के एन.डी.ए. सरकार रा तीजा कार्यकाल मांय अजे ई 11 लाख नुवी लखपति दीदियां लखपति बणी है।

000

प्रधानमंत्री नरेन्द्र मोदी कह्यो है के है कि अंतरिक्ष रा हलका मांय सुधारां ऊं देश रा नौजवानां ने फायदो व्ह्यो है। वणा कह्यो के ई मीना री 23 तारीख ने देशवासियां पहलो राष्ट्रीय अंतरिक्ष दिवस चंद्रयान-3 री कामयाबी ने जश्न रा रूप मांय मनाया। आज आकाशवाणी ऊं मन की बात कार्यक्रम मांय प्रधानमंत्री कह्यो के लारला साल 23 अगस्त ने चंद्रयान-3 ने चंद्रमा रा दिखणाद भाग शिव-शक्ति बिंदु माथे कामयाबी पूरण उतार्या हा। प्रधानमंत्री कह्यो के भारत आ कामयाबी

हासिल करण वाळो दुनिया रो पैलो देश बण ग्यो।प्रधानमंत्री कार्यक्रम रे दौरान स्पेस सेक्टर मांय स्टार्टअप सुरू करण वाळां नौजवानां ऊं बतळ ई करी। श्री मोदी मन की बात कार्यक्रम री मार्फत नौजवानां ऊं विकसित भारत रा लगस ने हासिल करण सारू देश रा पॉलिटिकल सिस्टम ऊं जुड़ण री अरज करी। वणा कह्यो के ई साल लाल किलां ऊं वणा गैर राजनैतिक पृष्ठभूमि वाळा एक लाख नौजवानां ने राजनैतिक हलका ऊं जुड़ण री अरज करी ही। इण रे पछे घणकरां नौजवानां प्रतिक्रिय दी अर वे राजनीति मांय आवण सारू उमाऊ है। अर सही मौका अर मार्गदर्शन री तलाश कर रह्या है। प्रधानमंत्री कह्यो के लोगां रा जीवन मांय फिटनेस घणी जरूरी है। वणा फिट रहवण सारू लोगां ऊं आप रा खान-पान अर जीवन शैली माथे ध्यान देवण ने कह्यो। श्री मोदी लोगां ऊं सुपर फूड मोटा अनाज ने आप रे रोज रा भोजन मांय भेळा करण ने कह्यो। प्रधानमंत्री कह्यो के टाबरां री चोखी सेहत सारू जरूरी है के वां ने सही पोषण मिलतो रहवे। टाबरां रो पोषण देश री प्राथमिकता है। श्री मोदी कह्यो के हर साल देश मांय पोषण मीनो मनायो जावे है। लारली साल पोषण अभियान ने नुवी शिक्षा नीति ऊं ई जोड़िज्या है। वणा ई अभियान ऊं जुड़ण री अरज करी।

.....
 प्रधानमंत्री हर घर तिरंगा अभियान मांय देशवासियां कानी ऊं दिखायी ज्या उमाव साथे कह्यो के ओ अभियान आखा देश ने एक सूत्र मांय बांध दिया। श्री मोदी कार्यक्रम री मार्फत लोगां ऊं पर्यावरण संरक्षण री ई बात कही। प्रधानमंत्री देश वासियां ने आवता तिवारां –जन्माष्टमी, गणेश चतुर्थी, ओणम, मिलाद-उन-नबी अर तेलुगु भाषा दिवस री शुभकामनावां दी।

वणा आवण वाळां दिना सुरू व्हे रह्या पेरिस पैरालंपिक खेलां मांय हिस्सो ले रह्या खिलाडियां रो हौसलो बधावण सारू हेश टेग चियर फॉर भारत रे साथे खिलाडियां ने बधावो देवण ने कह्यो। प्रदेश मांई ई मन की बात कार्यक्रम ने ले र उमाव निजर आयो। घणखरी ठौड़ां लोगां मन की बात कार्यक्रम ने सुण्या। मुख्यमंत्री भजन लाल शर्मा आज जोधपुर रा एस.एन. मेडिकल कॉलेज सभागार मांय मन की बात कार्यक्रम री 113 वी कड़ी ने सुण्या। ई दौरान भाजपा प्रदेश अध्यक्ष मदन राठौड, संसदीय कार्यमंत्री जोगाराम पटेल समेत घणी तादाद मांय जननुमाइन्दा अर भाजपा कार्यकर्ता मौजूद रह्या। जैसलमेर सांचौर अर भीलवाड़ा मांय भाजपा कार्यकर्तावां अर जनप्रतिनिधियां मन की बात कार्यक्रम ने सुण्या। टोंक जिला मांय ई केई ठौड़ां माथे लोगां मन की बात कार्यक्रम सुण्या।

000

केंद्रीय मंत्रिमंडल केन्द्रीय कर्मचारियां सारू एकीकृत पेंशन योजना ने मंजूरी दे दी है। इण मांय पेंशन री गारंटी दीरीजी है। सूचना अर प्रसारण मंत्री अश्विनी वैष्णव मंत्रिमंडल री मीटिंग रे पछे काले नुवी दिल्ली मांय बतायो के ई योजनां मांय कम ऊं कम 25 साल री सेवा पूरी करण वाळां कर्मचारियां ने आखिरी रा 12 मीना रा मूल पगार रा औसत री पचास फीसदी रकम पेंशन रा रूप मांय दी जायेला। केन्द्र सरकार रा ई फैसला ने ले र राजस्थान मांय कार्यरत केन्द्रीय कर्मचारियां मांय खुशी री लहर है। उत्तर-पश्चिम रेलवे एम्प्लोइज युनियन रा महामंत्री मुकेश माथुर गारंटीड पेंशन योजना री मांग ने यूपीएस मांय ठौड़ दिया जावण माथे केन्द्र सरकार की सरावना करी।

.....
 कृषि विज्ञान केन्द्र भीलवाड़ा रा ठांवा वैज्ञानिक डॉ. सी.एम यादव पारिवारिक पेंशन तैय कर्या जावण माथे केन्द्र सरकार रो आभार जतायो।

.....
 ऑल इण्डिया एससी/एसटी रेलवे एम्प्लोइज रा अध्यक्ष बी.एल बैरवा कह्यो के यू.पी.एस. रे तैत रिटायर कर्मचारियां ने पूरो फायदो मिलेला, जो सरकार रो सराहवना जोग कदम है।

000

प्रदेश रा न्यारा-न्यार हलकां ऊं मझला दर्जा री बिरखा रो दौर चाले। राज्य मांय लारला 24 घंटा मांय सब ऊं बत्ती 14 सेंटीमीटर बिरखा दौसा मांय दर्ज करी ज्यी। सिरोही रा रेवदर मांय 13 अर सवाईमाधोपुर रा चौथ का बरवाडा मांय 12 सेंटीमीटर पाणी बरस्यो। डीग मांय आज तेज बिरखा होवण ऊं सड़का माथे पाणी भरीज ग्यो। पाली मांय संवारां ऊं ई रूक-रूक ने बिरखा रो दौर चाले। नीम का थाना जिला मांय लारला दो दिनां रा तेज तावड़ां रे पछे बिरखा रो दौर सुरू

व्हयो। माउंट आबू समेत सिरोंही जिला मांय आज चोखी बिरखा व्ही। ई बिरखा ऊं नदी-नाळां मांय पाणी री आवक तेज व्हे ग्यी है। अजमेर मांय तेज बिरखा रे पछे आनासागर मांय पाणी री आवक बधण ऊं झील रा सगळा गेट खोल ने पाणी री निकासी करी जाय री है। कोटा मांय लगातार बिरखा ऊं पाणी री आवक बधण ऊं आज कोटा बैराज रा दो गेट खोल ने पाणी री निकासी करी ज्यी। मौसम केन्द्र जयपुर मुजब कम दबाव रो तंत्र सक्रिय होवण ऊं राज्य रा दिखणाद अर अगूणी हलकां मांय आवता दो-तीन दिन भारी अर घणी भारी बिरखा होवण री करडी आस है। राज्य मांय भारी बिरखा री गतिविधियां मांय 28 अगस्त ऊं कमी आवण री आस है।

000

केंद्रीय युवा मामला अर खेल मंत्री डॉ. मनसुख मांडविया नागरिकां ऊं ई मीना री 29 तारीख राष्ट्रीय खेल दिवस रे मौके कम ऊं कम एक घंटा ताई किण ई मैदानी खेल मांय हिस्सो लेवण री अरज करी है। सोशल मीडिया माथे पोस्ट करी ज्या एक वीडियो संदेश मांय डॉ. मांडविया कह्यो के आउटडोर खेलां मांय लोगां री भागीदारी फिट इंडिया मूवमेंट ने आगे बधावेला। वणा ओ ई कह्यो के प्रधानमंत्री नरेंद्र मोदी रो 'खेलेगा इंडिया, तभी तो खिलेगा इंडिया' रो नजरियो देश रा खेलां रे प्रति मार्गदर्शन देवेला। राष्ट्रीय खेल दिवस रे मौके राज्य मांय ई न्यारी-न्यारी खेल गतिविधियां व्हेला।

सांचौर अर दौसा जिला मांय 26 ऊं 31 अगस्त ताई न्यारी-न्यारी खेल गतिविधियां करेला। ई दौरान खेलां रे साथै-साथै स्वच्छता अर वृक्षारोपण कार्यक्रम ई व्हेला।

000

राजस्थान माध्यमिक शिक्षा बोर्ड कक्षा 10 वी अर 12वी री परिक्षा 2025 रा अर्जी फोरम देवण री तारीख 2 सितंबर ताई बधा दी है। अबै बिना लेट फीस रे 2 सितंबर ताई फोरम भर्या जा सकेला। बोर्ड सचिव कैलाश चंद शर्मा बतायो अजै ताई 15 लाख ऊं बत्ती परीक्षा फोरम मिल चुक्या है।

000